

Friday, June 13, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



WORLD BLOOD DONOR DAY

Land Revenue & Settlement Minister Pu B. Lalchhanzova’n ruihhloin a tihbuai chhungkua ten midang puh mai lova enkawl chu mahni mawh a lak theuh a pawimawh tih a sawi.

Vawiina Mizoram State Aids Control Society (MSACS) leh Association for Voluntary Blood Donation (AVBD) buatsaiha khawvel huapa a thlawna thisen pe thin te Ni, World Blood Donor Day puala Dawrpui Multipurpose Centre, Aizawla hun buatsaih a hmanpuinaah Minister he thu hi a sawi a. Ruihhloin a tihbuai a tihbuai fa nei, nu leh pa, an fate home a dah kher lo a, mahnia manganpuia, mualpho pui ngam, khawiah emaw an harsatna ben per zel tum lo ram in a mamawh tih sawiin Minister chuan an thatlai hun berah ruihhlo hnawl ngam a, dam rei tura taksa vawn that a pawimawh thu a sawi a, a thlawna thisen pe thin te chu an thiltih a lar loa a lan pawhin ram pumin a hria, Pathianin a hriatpui a ni tih sawiin a thlawna thisen pek chu dawngtute tan pawh thil lawmawm tak a ni a ti a. Midangte tana inpekna a tam chuan malsawmna a lo thleng thin tih a sawi.

Kumina World Blood Donor Day hian thupuih 'thisen pe la, beiseina siam rawh, tangrualin nunna kan chhan thei' tih, "Give Blood, give hope: together we save lives" tih hman a ni a. MSACS tarlan danin nikum tangka kum chhung khan thisen unit 34,752 pek niin heta zaa 93.71, unit 32,566 chu a thlawna pek a nih thu an tarlang a. Kumin tangka kum kal mekah April atanga May thla chhung khan thisen Unit 5,713 pek tawh niin heta zaa 90.11, unit 5,148 chu a thlawna pek a ni a. Blood Donation Camp 90 buatsaih a ni tawh bawh a ni.

Vawiin World Blood Donor Day puala hun hmanah hian thisen pe tha te lawmman hlan a ni a. Zirlaite kalkhawmin thisen pe turin thu an tiam bawh a ni.



YUVIKA 2025

Indian Space Research Organisation buatsaih Young Scientist Programme (YUVIKA) 2025 thla liamtaa Shillong khawpuia buatsaih ah zirlai sing 9 chuang dilna lut zingah Lalremruata Renthlei, Thenzawl khua PM SHRI Jawahar Navodaya Vidyalaya, Thenzawl-a pawl 9 zirlai chu thlan a ni.

Lalremruata Renthlei hi Pu Liantluanga Renthlei fapa niin Thenzawl ah an cheng mek a, YUVIKA 2025 tel tura thlan mi 350 zingah telin dilna hi sing 9 sang 8 vel a lut a, Lalremruata Renthlei hi Mizoram atanga kal 8 zinga Mizo awmchhun a ni.

Lalremruata Renthlei chuan YUVIKA 2025 chu a hlawkpui thu sawiin van thengreng chanchin leh India hmasawna hrang hrang a takin an hmu thei a ti a, mithiam tak tak kamchhuak hriat tur a awm bakah zirlai dang te nen hlawk thlak takin hun an hman thu a sawi.

Shillong khawpuia North Eastern Space Applications Centre (NE-SAC)-a May ni 19 atanga ni 30 inkara neih YUVIKA 2025 ah hian science thiamna chi hrang hrang bakah van thengreng chanchin leh tunlai thiamna hman tangkai dan hrang hrang te zirtir an ni a, mithiam tak tak ten zirlai te hmasawna tur hrang hrang an sawi a ni.

YUVIKA 2025 ah hian Rohini 200 rocket kah chhuah chu Live a en ho a ni a, vansang lama India tana fehchhuak thin Angad Prathap hnen atangin thu pawimawh hrang hrang ngaihthlak niin zirlaite hian Guwahati Planetarium bakah sipai hmunpui Eastern Air Command te pawh an tlawh bawk a ni.



VKSA

Kut hnathawh tunlai mil tura beihpui thlakna Viksit Krishi Sankalp Abhiyan (VKSA) chu Mizoram khaw 700 chuangah kalpui mek a ni.

Wawiin khan Lungsan RD Block chhunga khaw 8 - Phairuankai, Lalnutei, Lungrang South, Lungsan, Chhumkhum, Silgur, Rangte leh Rualalung-ah te hun buatsaih a ni a, VKSA campaign-ah hian Agriculture, Horticulture, AH & Veterinary, Krishi Vigyan Kendra (KVK), Soil, Sericulture leh Fisheries official-te feh chhuakin, he'ng khaw pariata kut hna thawktute nen hun an hmang ho va. Thlai chin, ran vulh, sangha leh pangang khawi leh kut hna thawh kaihnawih hriat tur pawimawh hrang hrangte, thlai chi tha leh tun lai thiamna hman tangkai dan te, thlai leh ran natna enkawl dan te, lei tha hman dan leh sawrkar ruahmanna hrang hrangte an zirtir a ni.

Lungsan Block hi NITI Aayog hnuiaia block dawm kan ngai bik, aspirational block a nih angin Lunglei District Administration kaihhruainain kawng hrang hrangah hma sawna huap zo leh thuantling a awm theih nan hma lak chhoh mek a ni.



CYMA

Central YMA chuan YMA Day vawi 90-na pualin Damdawi In leh Home hrang hrangah thilpek a sem a. Mizoram pawna Mizo Welfare thenkhatah a hlan bawk.

Kumtina tih thin angin Central YMA chuan India ram khawpui hrang hranga Mizo Welfare 17 hnenah YMA Day chibai bukna Rs.15,000/- theuh a pe a, Aizawl khawpui chhunga Sawrkar leh Kohhran Damdawi In 6 ah Rs.15,000/- theuh a hlan bawk.

Nimin khan Tawngtai Bethel Camping Centre (TBCC), OKM Home leh Thutak Nunpuitu Team (TNT) ah te buhfai bag 50 theuh an hlan a, Central YMA chuan kumin YMA Day hi Pathianni a nih avangin Sub- Hqrs, Group leh Branch YMA te chu mahni remchan angin Inrinni emaw Thawhtanni emaw a hmang mai turin hriattirna a ti chhuak a. Hmun hrang hranga YMA Day hman pui turin Central YMA hruaitute leh Sub- Hqrs hruaitute pawh an zin chhuak dawn a ni.

Central YMA thuchhuah tarlan danin YMA Day vawi 90-na hlim tak leh tluang taka hmang turin YMA member zawng zawngte duhsakna a hlan a. YMA chu tlawmngai pawl, tanpui ngaite tanpuitu a nih angin YMA Day ah mahni huamchhung theuhvah chanhai, riangvai tanpui ngaite tanpui a, midang tana ke pen chhuak turin Sub- Hqrs, Group leh Branch YMA te a ngen tih a sawi.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar puan leh a ni ang.



PM MODI

Prime Minister Narendra Modi chuan tukin khan Gujarat-a Air India thlawhna tlakna hmun a hliam tuarte enkawlina hmun Ahmedabad Civil Hospital a tlawh a, Pu Modi chuan he chhiat tawhna hi pawl a tih thu sawiin nunna chan ta chhungte chu a tuarpui thu a sawi a ni.

Air India Thlawhna tla ah hian mi 241 in nunna an chan a, India mi British a awm Vishwash Kumar Ramesh chu dam chhuak in, ani pawh hi PM hian a tlawh nghal a, hemi hnu hian Pu Modi hian thlawhna chetsualna hmun hi a tlawh bawk a ni. Akashvani Correspondent in a sawi dan in ruang te hi post-mortem an nih hnu ah an chhungte hnen ah hlan zel an ni a, tun thleng in ruang 4 chu an chhungte hnenah hlan an ni tawh a ni.

Nimin khan Boeing 787-8 London pan a thlawk thlawhna hi chesual in thlawhna a thawk mi 12 leh khualzin te nen mi 241 in nunna an chan a, thlawhna hi airport atanga a thlawh chhuah hnu lawk ah BJ Medical College bul ah a tla ta a ni.

(NewsonAIR)

